

Jambatan runtuh di Kampung Lee Kong Chian akibat banjir diperbaiki

Penduduk tarik nafas lega

Oleh **MUHAMAD AIMY AHMAD**
kota@utusan.com.my

KUALA LUMPUR 26 Dis. - Kira-kira 300 buah keluarga di Kampung Lee Kong Chian, Batu 5, Jalan Gombak dekat sini, boleh menarik nafas lega apabila jambatan runtuh di Sungai Kerongkong kini sudah boleh digunakan.

Jambatan sepanjang kira-kira 20 meter yang menghubungkan rumah penduduk dengan jalan utama itu runtuh dalam kejadian banjir pada Ogos lalu.

Kejadian tersebut turut menyebabkan tebing-tebing di sekitarnya terjejas.

Pengerusi MCA Wangsa Maju, Datuk Yew Teong Look berkata, kerja-kerja memperbaiki struktur jambatan runtuh itu telah siap dijalankan kira-kira dua minggu lalu.

Menurutnya, dengan siapnya kerja-kerja baik pulih itu penduduk tidak lagi perlu berhadapan dengan masalah untuk keluar masuk ke pusat bandar.

"Aliran kuat seperti 'air terjun' itu dipercayai berpunca daripada perangkap sampah yang dipasang Dewan Bandaraya Kuala Lumpur (DBKL) sebelum ini.

"Apabila lubang-lubang di perangkap sampah itu dipenuhi sampah, air sungai melimpah laju di bahagian atas perangkap sehingga menyebabkan jambatan ini roboh," katanya.

Beliau berkata demikian ketika ditemui semasa meninjau keadaan



YEW Teong Look (kanan) melihat struktur jambatan runtuh yang telah siap dibaiki di Kampung Lee Kong Chian, Batu 5, Jalan Gombak, Kuala Lumpur, semalam. - UTUSAN/AZLIZA HAILANI

jambatan di situ yang turut disertai wakil Jabatan Kejuruteraan Awam, DBKL di sini hari ini.

Seorang penduduk **Ng Guat Fung**, 50, turut melahirkan rasa gembira dengan kerja-kerja baik pu-

lih jambatan itu.

Bagaimanapun katanya, dia sedikit terkilan kerja-kerja pembinaan struktur jambatan itu telah menyebabkan keretakan kecil di bahagian lantai dapur dan tandas rumahnya.

"Saya harap pihak DBKL dapat memperbaiki keretakan ini kerana bimbang ia akan menjadi semakin besar, tambahan pula rumah kami hanya beberapa meter dari Sungai Kerongkong," katanya.

Guat Fung yang sudah 40 tahun menetap di situ juga berharap agar perangkap sampah tidak lagi dibina berdekatan jambatan dan rumahnya memandangkan bau busuk sampah turut mengganggu mereka sekeluarga.

 Aliran kuat seperti 'air terjun' itu dipercayai berpunca daripada perangkap sampah yang dipasang Dewan Bandaraya Kuala Lumpur (DBKL) sebelum ini

DATUK YEW TEONG LOOK
Pengerusi MCA Wangsa Maju